



大清文宗協天翊運執中垂謨懋德振武聖孝淵恭端仁寬敏  
顯皇帝實錄卷之三百五

咸豐十年庚申春正月丙寅朔

上詣

奉先殿行禮○詣

堂子行禮○遣官祭

太廟後殿○御太和殿受朝○作樂宣表如儀○詣

壽皇殿行禮○御乾清宮○賜王大臣○蒙古王○貝勒○貝子○公○額駙○

台吉○及外藩使臣等宴○

萬壽覃恩頒詔天下○詔曰朕丕纘

鴻圖誕膺

寶命仰荷

上蒼篤眷

列聖詒謀。臨御以來。於今十載。萬幾兢業。百爾欽承。開言路以達聰。舉賢才以輔治。勵一心之寅畏。戒三事之因循。在宥羣生。遇偏災而頻蠲正賦。勤求上理。斷疑獄而益慎祥刑。乃日敬之衷。常存夙夜。而時雍之化。未徧寰區。命將專征。秉大公以行賞罰。養兵籌餉。出左藏以拯黎元。勞旋帥於畿南。早聞奏凱。試師于江上。遲覩銷兵。飛鴉未變。夫好音。嗷雁難期。其安集。披章宵旰。決策焦勞。今歲六月。令辰。為朕三旬慶節。

方冰淵之自惕。奚岡阜之侈陳。惟念臣民共效。襲軒允宜。中外覃敷膏澤。既先開夫慈榜。嘉惠儒林。更特沛夫綸章。推恩寰海。乘春錫福。予一人上迓。

天庥。率土臚歡。俾萬姓同登壽域。所有應行事宜。開列於後。一。五嶽四瀆等祀。應遣官致祭。著察例舉行。一。

歷代帝王陵寢。

先師孔子闕里。應遣官致祭。著察例舉行。一。自王以下。至八分公。俱加紀錄四次。一。宗室覺羅。俱賞養贍銀一月。一。滿漢大臣年六十以上者。俱加紀錄二次。一。內外滿漢文武各官。俱加一級。一。內外大小各官。除各以現在品級已得封贈外。

凡升級及改任者。著照新銜封贈。一。國子監貢監生。及各官學教習。免坐監期一月。一。各省儒學。以正貢作恩貢。以次貢作歲貢。一。滿漢孝子。順孫。義夫。節婦。該管官細加諮訪。確具事實。奏交禮部覈實旌表。一。八旗滿洲蒙古漢軍兵丁。及內扎薩克。喀爾喀等蒙古。年七十八十九十以上者。分別賞賚。至百歲者。題明旌表。一。軍民年七十以上者。許一丁侍養。免其雜派差役。八十以上者。給與絹一匹。棉一斤。米一石。肉十斤。九十以上者。倍之。至百歲者。題明旌表。一。直省有坍沒田地。其虛糧仍相沿追納者。該地方官查明咨部奏請豁免。一。從前各省偏災地方。所有借給貧民籽種口糧牛具等項。查

明實係力不能完者。著予豁免。一。各處養濟院。所有鰥寡孤獨。及殘疾無告之人。有司留心。以時養贍。毋致失所。一。內外官員。有因公註誤。降革留任者。該部查明奏請開復。一。各省軍流以下人犯。俱著減等發落。一。各省監禁人犯。著將上年秋朝審緩決。至三次各犯。仍照節次查辦之例。查明所犯情節。分別減等發落。其緩決一二次人犯。內有案情本輕。可予矜原者。亦著該部查明請旨定奪。於戲物阜年康。雨暘若而撫時茂對。定功保大。民人宜而受祿延釐。布告天下。咸使聞知。○諭內閣。本年朕三旬慶辰。茲屆履端初吉。業經特沛恩綸。延釐中外。因念推恩之序。允宜首重親親。惇郡王奕諒。著

加恩晉封親王。貝子奕劻。著加恩晉封貝勒。惠親王之子奕  
詳。恭親王之子載澂。均著加恩封為八分輔國公。惠親王  
之子奕詢。奕謨。均著加恩封為不入八分鎮國公。貝勒載治  
溥莊。均著加恩賞加郡王銜。醇郡王奕讓。著加恩賞銀三千  
兩。鍾郡王奕詒。孚郡王奕譞。均著加恩賞銀二千兩。俱由內  
給發。用示朕覃敷闡澤。篤念宗支至意。○又諭。本年朕三旬  
慶辰。業經渥敷闡澤。而中外王大臣。有勤勞素著者。允宜特  
沛恩施。怡親王載垣。科爾沁親王僧格林沁。均著加恩賞穿  
杏黃色端罩貂褂。其朝服蟒袍。仍用藍色。鄭親王端華。著賞  
穿四團正龍補服。並著在紫禁城內乘坐二人肩輿。大學士

彭蘊章。尚書穆蔭。均著加恩賞戴花翎。侍郎杜翰。著加恩加  
二級。侍郎匡源。文祥。均著加恩加一級。以上加級在恩詔以  
外。並准作為隨帶。侍郎靈桂。著加恩賞還二品頂帶。直隸總  
督恆福。著加恩賞戴花翎。兩江總督何桂清。著加恩加太子  
太保銜。用示朕宣綸錫羨之至意。○又諭。本年朕三旬萬壽。  
著毋庸舉行告祭禮。所有升殿禮儀。著停止。○又諭。本年朕  
三旬萬壽。王公百官。仍著穿蟒袍補服七日。○又諭。本年朕  
三旬萬壽。各省督撫。及將軍提鎮等。俱不准奏請來京祝嘏。  
○予河南丁寨陣亡遊擊孫喬林等。祭葬世職。○丁卯。  
上御紫光閣。賜王大臣。蒙古王。貝勒。貝子。公。額駙。台吉。及外藩

使臣等宴。並賞賚有差。○御乾清宮。賜近支親藩等宴。○以駐藏辦事大臣崇實。為鑲黃旗漢軍副都統。○以江西南昌新建。豐城。進賢。金谿。鄱陽。餘干。萬年。建昌。德化。德安。湖口。十二縣被災較重。命平糶倉穀。○展緩直隸固安。永清。東安。武清。甯河。盧龍。束鹿。安。天津。青。靜海。滄。南皮。鹽山。慶雲。晉。無極。藁城。邢臺。沙河南。和。唐山。平鄉。廣宗。鉅鹿。內邱。任。永年。邯鄲。成安。肥鄉。曲周。廣平。雞澤。磁。大名。南樂。清豐。豐潤。玉田。南宮。新河。武邑。衡水。趙。柏鄉。隆平。臨城。甯晉。深。武強。饒陽。五十二州縣被災地方。新舊額賦。給固安縣貧民口糧有差。○戊辰。高宗純皇帝忌辰。遣官祭。

裕陵。○諭內閣。本年秋朝審情實各犯。著停其句決。○予故甯夏將軍托雲保。祭葬如例。諡剛恪。○己巳。以神靈顯佑。頒福建甯洋縣。

關帝廟

御書扁額。曰功被瀛壖。○諭內閣。本年朕三旬萬壽。特頒恩詔。德木楚克扎布。拉木棍布扎布。德木齊扎布。布彥諾謨。枯。棍楚克林沁。多爾濟那木凱等。或平日當差勤慎。或奮勉出力。自應各沛恩施。德木楚克扎布。著加恩賞穿親王補服。拉木棍布扎布。著加恩封為郡王。及身而止。德木齊扎布。布彥諾謨。枯。均著加恩賞用紫韁。棍楚克林沁。著加恩在御前上行。

走多爾濟那木凱。著加恩賞給頭品頂戴。以示朕行慶推恩之至意。○又諭本年朕三旬萬壽。業經降旨。所有各省督撫將軍副都統等。均著毋庸來京瞻覲。惟思各蒙古等。素習敦樸。朕亦推誠優待。該王公台吉等。尤不可狃於繁文。况此次年班來京之各蒙古王公台吉等。尚未旋回。於六月間。如仍令伊等來京祝嘏。正值炎暑。往返跋涉。尤不合體恤蒙古臣僕之意。著理藩院傳諭御前乾清門行走之蒙古汗王公台吉等。於本年六月朕萬壽聖節。均著毋庸來京祝嘏。以示朕體恤各蒙古之至意。○又諭都統勝保。自簡任欽差大臣。督勦皖省捻匪。尚知奮勉。迨護城一挫以後。軍威不能復振。以

致廬定不能克復。逆匪蔓延。日久無功。實有難辭之咎。著即撤去欽差大臣。以示薄懲。惟念該都統平素帶兵勇往。曾立戰功。現在豫省堵勦需人。著即馳往河南。督辦該省勦匪事宜。即派關保為勝保幫辦。袁甲三仍著署理欽差大臣關防。督辦安徽軍務。除翁同書本係幫辦外。並派副都統穆騰阿。幫辦軍務。傅振邦著督辦徐宿一帶勦匪事宜。仍著田在田。幫辦其山東勦匪事宜。即派德楞額督辦。並派乾清門三等侍衛哈勒洪阿幫辦。著即馳驛前往。傅振邦。無庸幫辦。袁甲三軍務關保。亦無庸幫辦。傅振邦勦匪事宜。以期事權歸一。各有專司。自此次分派之後。儻有賊匪由何路北竄。即將何

路督兵大臣嚴加懲處。決不寬貸。其有應行互相援應之處。仍不得區分畛域。爾諸臣其同心協力。盡殲醜類。迅速蕝功。毋負委任。○以江西捐輸軍餉。永廣新建縣學額十名。高安縣八名。南昌新昌二縣各六名。豐城廬陵二縣各四名。清江縣三名。奉新縣二名。奉和金谿南城新城都昌德化贛七縣各一名。○蠲緩山東臨清齊東齊河禹城長清平原東平東阿平陰惠民陽信樂陵霑化蒲臺滋陽澤汶上陽穀荷澤單曹鉅野濮觀城朝城茌平莘高唐益都博興樂安昌樂臨朐昌邑邱金鄉嘉祥濟甯厯城新城濟陽肥城青城海豐鄆城莒恩臨淄高苑壽光濰夏津魚臺章邱滕壽張范五十七州

縣被水被旱被蟲被雹村莊額賦有差。○庚午諭內閣。惇親王次子載漪著承繼與瑞敏郡王奕誌為嗣。○諭軍機大臣等。昨因安徽捻匪時常出擾徐宿及河南山東等處。降旨派勝保等分路督辦。以期事權歸一。各有專司。現在東豫各境賊蹤雖遠。而該捻出沒靡常。勢極飄忽。北省地勢平行。無險可扼。仍恐乘虛紛竄。亟宜豫籌堵截。前經通飭各省。實行團練。以助兵力。現在徐宿地方緊要。著何桂清嚴飭該地方官認真團練。俾傅振邦等可以合力勦辦。不至有兵力單薄之慮。河南歸陳等屬。曾經辦理堅壁清野。山東曹單一帶。團練向稱得力。著瑛。祭文煜再行嚴飭各該地方官。實心經理。不

得因賊氛已遠。稍有懈弛。至山東曹州民團。修築黃河北隄。限賊馬隊。惟考城地方。未經加築。上年九月。該匪即由此竄入。擾及東明長垣。自曹境而東。直至宿遷。亦未修築。若仿照曹州河隄。一律加修。認真挑築。使沿河大隄。屹若堅城。亦可藉資守禦。著何桂清。瑛。勸諭紳民。妥為辦理。毋得視為具文。將此由五百里各諭令知之。○辛未。諭軍機大臣等。前因曹澍鍾奏。粵西軍餉支絀。當諭令駱秉章。設法將劉長佑。及劉坤一。各軍餉銀。暫行照數按月撥解。其四川。山西。陝西。所有報解。及奉撥粵西軍餉銀兩。亦應趕緊籌解。茲據劉長佑奏。體察粵西民情。賊情均利速勦。惟餉需拮据。難以措手。請

飭催各省協濟餉銀。依限起解。以應急需等語。自係實在情形。粵西連年被賊。兵餉兩絀。現在石達開大股逆匪。仍蔓延慶遠一帶。若不及早勦除。恐奔黔竄蜀。必至句結為患。劉長佑一軍。前經駱秉章派赴粵西。援勦糧餉。均由湖南支給。自湖南未能按月接濟。尚欠銀數萬兩。粵西情形。萬分支絀。劉長佑辦理防勦。正當喫緊之時。勢不能停兵待餉。勞崇光有統轄兩省之責。自應通籌全局。設法兼顧。著就近接濟餉糈。俾無缺乏。以資攻勦。並著駱秉章。仍遵前旨。按月如數撥解。所有四川。山西。陝西。應行撥解粵西軍餉。亦著趕緊籌撥。協濟毋稍延緩。致誤要需。將此由六百里各諭令知之。○又諭。

曾望顏奏石逆謀入川境。亟應嚴防等語。石進攻陷廣西慶遠府。逼近黔省都勻。意圖由黔入川。該省合江。敘永。瀘州。綦江。江津。南川一帶。均與黔境毗連。設令竄入。不惟川省完善地方。遭其蹂躪。即陝西。湖北。亦將震動。於大局甚有關繫。著曾望顏。嚴飭川南川東所屬文武。一體偵探。相機籌辦。並飭酉。秀。彭。涪。各防所文武。即將竄入黔匪。妥速勦辦。以杜勾結。其滇匪上竄。防禦不力。業將督兵之提督阜陞等。分別懲處。仍責令迅圖掃蕩。免致蔓延。至所稱川省營員。曉暢營務者。均調赴他省出征。存營員弁。多不得力。亦係實在情形。現在所調陝甘官兵二千名。計日可到。勦辦必能得手。惟陝甘地

方亦關緊要。此項官兵。未便久留在外。如川境漸就肅清。仍應撤回歸伍。向來各省營伍。兵丁多不足額。錢糧半為營員侵蝕。甚至老弱充數。空籍冒糧。種種弊端。殊堪痛恨。川省兵丁。多不得力。實由於此。該署督惟當嚴飭各營。挑選精銳。裁汰老弱。務使兵無懸額。餉不虛糜。儻有前項弊端。即或寬其既往。必當做其將來。如能操練有方。即以本省之兵。供本省之用。足數堵剿。不得專恃客兵援救。方為妥善。前據曹澍鍾奏。石逆大股。注意川境。已諭該署撫。如該逆竄出粵界。劉長佑一軍。務須跟蹤追剿。並諭駱秉章。飭令田興恕。蕭啟江兩軍。分途截擊。曾望顏亦當偵探賊蹤。飭屬迎頭堵剿。以殲醜

類而安邊圉。將此由六百里諭令知之。○以四川鐵蛇渡勦  
匪出力。賞軍功唐友耕。五品頂帶。以千總用。都司馬開昌。下  
部優敘。○以勦辦雲南竄匪不力。提督阜陞。按察使蔣徵藩。  
下部議處。革參將順福職。○予四川唐家溪等處陣亡守備  
楊登階。訓導易良直。祭葬世職。○壬申。  
世祖章皇帝忌辰。遣官祭

孝陵。○諭內閣。官文奏。請將揀發知府。降補同知等語。湖北揀  
發知府潘祥新。前經官文奏。請改歸京職。仍以郎中回原衙  
門。即補。當經吏部覈與定例不符。行令更正。茲據該督請以  
同知降補。著即給咨送部引見。其應否以同知降補。或可改

補京職之處。著吏部於帶領引見時。聲明請旨。○又諭。倭仁  
等奏。大計屆期。未接部文。懇請展限一摺。奉天省本年大計。  
尚未接到吏部行知。著准其展至二月內具題。至此項公文。  
如係在途遺失。即著該部補錄行知。以憑辦理。或係該部發  
文遲誤。亦著查明具奏。○又諭。有鳳等奏。川省土司屯番。籲  
懇進京祝嘏一摺。該土司等呈懇祝嘏。具見悃忱。但念路途  
遙遠。跋涉維勞。均著無庸前來。仍照舊輪流各按年班日期。  
來京朝覲。用示朕懷柔遠人。優加體恤至意。○諭軍機大臣  
等。官文奏。改設長江水師專營。現已抽足兵數。並籌辦大概  
情形一摺。自九江克復。全楚肅清。以後即經官文檄飭陸路

提鎮及通省各營視兵數之多寡分別按成於各兵出缺時扣留額缺共計扣出馬戰守兵二千名以備充補水師一俟皖省蕩平即改立水師專營所籌自係為慎重江防起見惟據該大臣稱以扣存兵額月餉提歸新設水師之費於常川操防養贍尚恐不敷仍須另議酌增但不得過水勇征餉之數現在水勇每名月需餉項若干仍著該大臣查明詳晰具奏至兵丁既有額缺未便令其虛懸著即行募補酌撥楊載福彭玉麟兩營調遣以資練習而助攻勦俟楚省撤防時或設水師提督或先派鎮協統帶再由該督定議具奏將此由五百里諭令知之○又諭曾望顏奏軍務未竣請續辦按糧

津貼以資接濟一摺川省連年籌解京外各餉暨本省糧餉防勦經費等項為數已至一千數十萬兩節經該督等奏請辦理按糧津貼源源接濟閭閻踴躍輸將實堪嘉尚現在各路軍務未竣滇黔各匪竄入川境防勦經費所需甚鉅據曾望顏奏請於咸豐十年再行勸諭紳民續辦按糧津貼實屬萬不得已之舉第恐不肖吏胥藉端擾累著該署督嚴飭各屬查照舊章遴選公正紳耆妥為經理不准假手胥吏致滋弊端其上中下戶之分儻該地方官高下其手蒙混侵蝕及有徵多報少等弊即著從嚴叅辦毋稍姑容庶於借資民力之中仍寓體恤民艱之意此項津貼銀兩俟收解完竣即由

該署督覈計多寡。奏請加廣學額中額。屆時再明降諭旨。以昭激勸。將此由四百里諭令知之。○  
上以孟春時享

太廟自是日始齋戒三日。○甲戌諭軍機大臣等。曹澍鍾奏。川省現在籌防。首以得人為重。臚舉所知各員。並陳石逆賊營各情。及酌籌勦辦等語。川省為完善之區。現在辦理防堵事宜。全在調度有方。得人任使。以冀收指臂之效。除總兵馬天貴。業經陣亡外。所有四川候補道程祖潤。重慶府知府李莊。馬邊廳同知孫濂。丁憂知府李玉臺。署酉陽州知州毛振壽。降調永甯道陳枚。四川提督阜陞。以上各員。現在業已帶兵

辦理防務者。毋須咨調。此外著該署督酌量調遣。以資差委。至蔣玉龍現在貴州。顏朝斌在湖北。各該省軍務未竣。未便遽調至川省。著無庸議。該署撫所陳石逆賊情。自係實有見聞。著曾望顏體察情形。先事豫防。妥籌勦辦。以保完善之區。曹澍鍾奏片。著鈔給閱看。將此由五百里諭令知之。○予江南浦口陣亡遊擊蕭勝南。守備梁奉年。把總周榮升。外委周天元。曾秀。祭葬世職。○乙亥。享

太廟。

上親詣行禮。○遣官祭

太歲之神。○御長春宮。賜惠親王。載垣。端華。僧格林沁。彭蘊

章。穆蔭。匡源。杜翰。文祥等食。○諭內閣。御史陳濬奏。請飭地方官整頓捕務。以安行旅。一摺。據稱山東沂州府及江蘇徐州府一帶。近有幅匪盤踞。出沒無常。自泰安府以北。至直隸雄縣固安等處。又有騎馬賊。往來肆行剽奪。近聞福建貢差。有在宿遷縣龍泉溝被劫之案。此外商民。恐被累者尚多等語。土匪擾害行旅。地方捕務。實屬廢弛。况本年恩榜特開。各省士子。踴躍觀光。儻令中途失事。不能及期入闈。應試未免向隅。著直隸。江蘇。山東。各督撫。嚴飭各該府州縣。認真緝捕。儻敢仍前玩泄。致有疏失。即著從嚴參辦。以靖地方。而安行旅。○又諭。何桂清奏。遵保堪勝水師總兵。並可備器使人員。

一摺。升署京口協副將鞠耀乾。著記名。以水師總兵用。俟軍務告竣。再行送部引見。廣東海門營參將李新明。廣東水師提標左營遊擊賴鎮海。江南京口水師右營遊擊郭定猷。均著俟軍務告竣。送部引見。○諭軍機大臣等。恆福奏。海口地方。防兵不敷。請添調官兵一摺。據稱沿海一帶。地方寬闊。海汊紛歧。若夷人附岸而登。同時告警。其勢不能彼此兼顧。擬請添調京兵二千名。及得力馬隊千名等語。自為思患豫防起見。惟現在已於直隸山東等省。備調精兵萬餘名。恆福請調各兵。著俟僧格林沁到津後。再行商辦。其直隸應調兵四千名。著恆福於該省北路各營內。挑選精銳。勤加操練。以備

調遣。本日已諭戶部由庫撥銀二十萬兩。分批解往天津海口。支發軍餉。以收飽騰之效。該督務須飭令糧臺。樽節支放。毋得虛糜。其直隸各屬。應解旗租銀兩。為數甚鉅。仍著該督嚴催解部。以抵此項撥款。毋任宕延。將此諭令知之。○予江南陣亡知縣丁昊。祭葬世職。○命山東巡撫文煜。山西巡撫英桂。各挑官兵二千名。西安將軍托明阿。挑官兵一千名。綏遠城將軍成凱。青州副都統恩夔。各挑官兵五百名。備各路軍營調用。○命熱河都統常清。密雲副都統玻崇武。各再挑官兵五百名。備天津防所調用。○撥部庫銀二十萬兩。解往天津防所。以濟軍餉。○以營伍廢弛。並查辦草率。革直隸山

永協副將雙慶職。留營效力。護通永鎮總兵官海綬。下部察議。○展陝西吳堡縣原緩帶徵兵糧。○丙子。

孝全成皇后忌辰。遣官祭。

慕陵。○署欽差大臣袁甲三奏。天長踞賊。未即就撫。惟懼西路官軍分勦。時思逃竄。得旨。該逆反覆無常。未必非緩兵之計。固應相機勦除。若仍真心悔罪。獻城殺賊。亦可准其投誠。○以安徽滁州來安解圍。賞協領恆祿。副都統銜遊擊朱元興。蔣立功。巴圖魯名號。守備朱得勝。劉萬金。拜殿元等。花翎。知州施照等。藍翎。餘升敘有差。○以安徽鳳陽勦賊出力。賞協領色普清額。委營總吉隆額。副都統銜防禦富珠隆。阿。花翎。

○丁丑諭內閣吏部奏遵議歷任河南巡撫藩司各員處分一摺河南一省歷年欠解京餉為數甚鉅節經戶部奏咨飛催置若罔聞實屬任意延宕前任河南布政使今升河南巡撫瑛榮著降補陝西按察使仍帶降二級留任處分現任河南布政使祥裕著改為降二級留任並降為三品頂帶前任河南巡撫調任山西巡撫英桂升任直隸總督恆福均著照部議降二級留任以上各員所得處分均不准其抵銷○又諭文煜奏知縣人地未宜請旨撤任議處等語山東樂安縣知縣朱源前因抗糧案內經崇恩查明雖無浮收勒折究屬不合奏請與日照縣張德霖對調嗣據部議以該員等均有

錢糧展參處分與例未符茲據該撫奏稱該員雖非激變未便飭回本任朱源著即行撤任調省察看仍交部議處其聚眾滋事之李金鼈等並飭嚴緝務獲究辦○諭軍機大臣等文煜奏遵籌海疆布置情形一摺據稱山東海岸迤長三千八百餘里武定等府均屬濱海惟青州地處各府之中擬令該滿綠各營勤加訓練何處有警即由該副都統及該營將官帶往何處救援其餘文登等營官兵同大沽口新設防兵一體會籌堵禦登標及文登營水師為數無多應暫行撤歸陸路仍由省派兵四百名前往登州交該鎮曾逢年統帶併原有官兵以一半守城一半守險並勤加瞭探如該府所屬

及萊州有警亦即分撥策應。仍勸諭紳民辦理團練。互相保衛等語。所籌尚屬周密。著即照所擬認真辦理。其各營官兵應如何勤加訓練以期得力。即著文煜嚴飭該將弁等實力講求。毋得視為具文。以致臨時貽誤。至所稱煙臺等處濱海居民。有不能辨團者。即令遷進內地。自係為煙戶稀少處設法。既難於團練。不若令其遷移內地。以免侵擾失業。前因各路軍務未竣。曾諭令恩夔於青州。德州。駐防兵內。挑選五百名。並令文煜於該省各營內挑兵二千名。一併聽候調遣。現在青州兵既以防海。此外綠營兵二千名。及德州兵丁。仍著文煜會同恩夔。如數挑選。認真操練。儻擒匪北竄。即可用以

堵剿。以備不虞。將此由四百里諭令知之。○以陝西布政使慶廉為河南巡撫。陝西按察使雷以誠。以三品頂帶為布政使。○以河南鄧州紳民捐助勇糧。永廣學額五名。○戊寅諭內閣。駱秉章奏營兵藉端滋事。審明定擬。並請將未能彈壓之文武員弁。分別懲處一摺。湖南岳州營守備王興基。千總安長慶。於兵丁疏忽門禁。既未能先事覺察。迨兵丁滋事。又不能即時彈壓。著一併革職。以肅營伍。署岳州城守營參將榮山。不能督率備弁。整飭營伍。岳州府知府馮崑。因嚴城禁枷責兵丁。尚係為慎重地方起見。惟未會同營員辦理。致令兵丁藉口滋事。亦有不合。榮山。馮崑。均著交部議處。○是日

立春。順天府進土牛春山寶座。○己卯

宣宗成皇帝忌辰。遣官祭

慕陵。○庚辰。

上詣

皇乾殿行禮。○詣

關帝廟拈香。○諭內閣。曾望顏奏。知府被訐藉案需索。請撤任。嚴訊一摺。四川已革赤水縣丞張長慶。將民人李延柄答責。後擅押釀命一案。經成都府知府翁祖烈等審辦。議以革職。茲據該署督奏稱。張長慶於被革後。呈訴前任四川總督幕友吳香農等。需索銀兩。該革員給銀二百兩。迨發成都府

審訊時。翁祖烈之子候補知州翁道醇。復向借銀。該革員給銀二百五十兩。翁道醇並有十年間借銀三百兩未還。各等語。案關官幕藉端索贓。虛實必應徹底根究。成都府知府翁祖烈。著先行撤任。交曾望顏提集全案人證。秉公嚴審。務期水落石出。以儆官邪。而成信讞。

大清文宗協天翊運執中垂謨懋德振武聖孝淵恭端仁寬敏  
顯皇帝實錄卷之三百五



